

Ár 2016, fimmtudaginn 23. júní, var fundur í kjararáði að Hverfisgötu 6a í Reykjavík haldinn af Jónasi Þór Guðmundssyni, Huldu Árnadóttur og Svanhildi Kaaber.

Fyrir var tekið:

Að ákveða laun og starfskjör ríkislögreglustjóra

I.

Samkvæmt 1. mgr. 1. gr. laga nr. 47/2006 um kjararáð, sbr. 1. gr. laga nr. 168/2007 um breyting á þeim lögum, er verkefni ráðsins meðal annars að ákveða laun forstöðumanna ríkisstofnana. Embætti ríkislögreglustjóra starfar samkvæmt lögreglulögum nr. 90/1996 með síðari breytingum og er ríkisstofnun. Heyrir því undir kjararáð að ákveða ríkislögreglustjóra laun.

II.

Kjararáði bárust bréf dagsett 10. og 15. júní 2015 frá ríkislögreglustjóra þar sem þess er óskað að kjararáð taki launakjör hans til endurskoðunar. Í bréfinu er bent á að laun ríkislögreglustjóra hafi dregist aftur úr launum ráðuneytisstjóra, ríkissaksóknara, ríkislögmans, forstjóra Samkeppniseftirlitsins og forstjóra Fjármálaeftirlitsins samkvæmt úrskurðum kjararáðs. Er í því sambandi vísað til 8. gr. laga um kjararáð þar sem kveðið sé á um að við úrlausn mála skuli kjararáð gæta innbyrðis samræmis í starfskjörum þeim sem það ákveður og að þau séu á hverjum tíma í samræmi við laun í þjóðfélaginu hjá þeim sem sambærilegir geti talist með tilliti til starfa og ábyrgðar. Einnig er vísað til þeirra breytinga sem orðið hafi á lögregluskipaninni með lögum nr. 51/2014 og áréttað að ríkislögreglustjóri sé æðsti yfirmaður lögreglunnar, næstur á eftir ráðherra samkvæmt 4. gr. lögreglulaga nr. 90/1996.

Með bréfum dagsettum 25. júní 2015 gaf kjararáð fjármála- og efnahagsráðuneyti og innanríkisráðuneyti kost á að leggja fram greinargerðir vegna erindisins, sbr. 6. gr. laga um kjararáð.

Fjármála- og efnahagsráðuneyti sendi kjararáði bréf dagsett 10. júlí 2015. Í bréfinu segir að fjármála- og efnahagsráðuneytinu sé ekki kunnugt um hvort eða með hvaða hætti kjararáð hafi tekið tillit til þeirra atriða sem fram koma í bréfi ríkislögreglustjóra við fyrri ákvörðun sína og telur eðlilegt að kjararáð horfi til þessa auk annarra viðmiðana við athugun á því hvort endurskoða skuli launakjör ríkislögreglustjóra.

Innanríkisráðuneytið sendi kjararáði bréf dagsett 9. júlí 2015. Í bréfinu kemur fram að ráðuneytið telji rétt að kjararáð skoði hvort launakjör ríkislögreglustjóra séu í samræmi við laun annarra forstöðumanna sem gegni sambærilegri stöðu og ábyrgð og kjararáð hafi að undanfögnu úrskurðað um.

Með bréfi dagsettu 14. júlí 2015 fékk ríkislögreglustjóri send bréf fjármála- og efnahagsráðuneytis og innanríkisráðuneytis til kynningar og honum gefinn kostur á að koma á framfæri athugasemdum við efni þeirra.

Í bréfi ríkislögreglustjóra dagsettu 17. júlí 2015 eru ekki gerðar athugasemdir við bréf ráðuneytanna. Í bréfi hans dagsettu 20. júlí 2015 er bent á að laun ríkislögreglustjóra hljóti eðli máls samkvæmt að verða ákvörðuð að minnsta kosti hærrí en laun lögreglustjóra höfuðborgarsvæðisins. Með tölvubréfum dagsettum 21. og 28. desember 2015 eru fyrri sjónarmið um endurskoðun launakjara til hækkunar ítrekuð og því til viðbótar bent á úrskurð kjararáðs um laun dómara.

Kjararáði barst einnig bréf frá stjórn Lögreglustjórafélags Íslands dagsett 7. janúar 2016 þar sem tekið er undir sjónarmið ríkislögreglustjóra.

III.

Samkvæmt lögreglulögum nr. 90/1996 fer ríkislögreglustjóri með málefni lögreglunnar í umboði innanríkisráðherra sem er æðsti yfirmaður lögreglunnar í landinu. Ráðherra skipar ríkislögreglustjóra til fimm ára í senn. Hann skal, auk almennra skilyrða til þess að hljóta skipun í embætti á vegum ríkisins, hafa náð 30 ára aldri, vera íslenskur ríkisborgari, vera svo á sig kominn andlega og líkamlega að hann geti gegnt embættinu, vera lögráða og hafa aldrei misst forræði á búi sínu, hafa hvorki gerst sekur um refsivert athæfi sem telja má svívirðilegt að almenningsáliti né sýnt af sér háttsemi sem getur rýrt það traust sem lögreglustjóri verður almennt að njóta. Þá skal hann hafa lokið fullnaðarprófi í lögfræði með embættis- og meistaraprófi eða háskólaprófi í þeirri grein sem metið verður jafngilt.

Hlutverk ríkislögreglustjóra samkvæmt lögreglulögum felst meðal annars í að kynna lögreglustjórum þær ákvarðanir handhafa ríkisvaldsins sem snerta starfsemi lögreglunnar og vinna að og fylgjast með því að þeim ákvörðunum verði fylgt í starfsemi lögreglunnar, að veita innanríkisráðherra upplýsingar um hvers konar lögreglumálefni og gera tillögur til ráðherra um almenn fyrirmæli til lögreglustjóra. Þá skal hann vinna að og gera tillögur um hagræðingu, samræmingu, framþróun og öryggi í starfsemi lögreglunnar. Ríkislögreglustjóri annast alþjóðasamskipti á sviði löggæslu og veitir lögreglustjórum aðstoð og stuðning í lögreglustörfum. Hann annast viðfangsefni sem eðli máls samkvæmt eða aðstæðna vegna kalla á miðstýringu eða samhæfingu á landsvísu eða samstarf við lögreglu í öðru landi. Einnig fer ríkislögreglustjóri með yfirstjórn löggæsluverkefna sem krefjast viðamikils undirbúnings. Hann skal halda málaskrá um kærur sem berast lögreglu um afbrot með öllum nauðsynlegum upplýsingum sem mál varða, dagbók lögreglu með upplýsingum um erindi til lögreglu og úrlausn þeirra, skrá yfir handtekna menn og aðrar skrár sem nauðsynlegar eru í þágu löggæsluhagsmuna til að afstýra yfirvofandi hættu eða sporna við afbrotum. Þá skal ríkislögreglustjóri annast málefni almannavarna í umboði innanríkisráðherra.

Í lögreglulögum er fjallað nánar um þau sérstöku verkefni sem ríkislögreglustjóra eru falin. Má þar sem dæmi nefna að ríkislögreglustjóri skal starfsrækja lögreglurannsóknardeild og greiningardeild sem rannsakar landráð og brot gegn stjórnskipan ríkisins og ædstu stjórnvöldum þess og leggur mat á hættu á hryðjuverkum og skipulagðri glæpastarfsemi. Einnig skal ríkislögreglustjóri starfrækja rannsóknastofu sem hafi eftirlit með framkvæmd tæknirannsókna lögreglu, þar með talið rekstri miðlægra gagnagrunna lögreglu á því sviði. Hann skal annast erlend samskipti og samstarf vegna slíkra tæknirannsókna, halda skrá um horfið fólk og hafa umsjón með störfum kennslanefndar og útgáfu leiðbeininga og verklagsreglna um tæknirannsóknir sem ríkislögreglustjóri setur. Þá eru ríkislögreglustjóra einnig falin verkefni með öðrum lögum, til dæmis lögum nr. 82/2008 um almannavarnir.

IV.

Í 8. gr. laga um kjararáð segir, að það skuli við úrlausn mála gæta innbyrðis samræmis í starfskjörum þeim sem það ákveður, og að þau séu á hverjum tíma í samræmi við laun í þjóðfélaginu hjá þeim sem sambærilegir geta talist með tilliti til starfa og ábyrgðar. Við ákvörðun sína skal kjararáð gæta þess að föst laun fyrir dagvinnu, annarra en forseta Íslands, verði ekki hærri en föst laun forsætisráðherra samkvæmt 3. gr. Við ákvörðun launakjara samkvæmt 4. gr. laganna skuli sérstaklega gæta samræmis milli þeirra og þeirra kjara hjá ríkinu sem greidd eru á grundvelli kjarasamninga annars vegar og ákvarðana kjararáðs samkvæmt 3. gr. hins vegar. Þá skuli kjararáð ætíð taka tillit til almennrar þróunar kjaramála á vinnumarkaði. Í 10. gr. laganna segir að ráðið skuli taka mál til meðferðar þegar því þyki þurfa og ætíð ef orðið hafa verulegar breytingar á þeim launum í þjóðfélaginu sem höfð skulu til viðmiðunar samkvæmt lögnum eða á störfum þeirra sem úrskurðarvald þess tekur til.

Kjararáð ákvað ríkislögreglustjóra laun 26. september 2013. Frá þeim tíma hafa laun hans tekið breytingum í samræmi við almennar ákvarðanir kjararáðs. Við ákvörðun launakjara ríkislögreglustjóra nú er horft til þeirra breytinga sem gerðar voru á lögregluskipaninni í upphafi árs 2015 og þess innbyrðis samræmis sem kjararáði ber að gæta og áður er gerð grein fyrir. Sem fyrr er annars vegar tekið mið af launakjörum lögreglustjórans á höfuðborgar-svæðinu og hins vegar af launakjörum ráðuneytisstjóra.

Með hliðsjón af framansögðu hefur kjararáð ákveðið að laun ríkislögreglustjóra skuli vera sem segir í ákvörðunarorði.

V.

Ákvörðunarorð

Frá og með 1. janúar 2015 skulu mánaðarlaun ríkislögreglustjóra vera samkvæmt launaflokki 502-140, nú 1.094.455 krónur. Að auki skal greiða honum 40 einingar á mánuði fyrir alla yfirvinnu er starfinu fylgir. Frá og með 1. júlí 2016 skulu mánaðarlaun ríkislögreglustjóra vera samkvæmt launaflokki 502-142, nú 1.170.443 krónur. Að auki skal greiða honum 40 einingar á mánuði fyrir alla yfirvinnu er starfinu fylgir.

Frá 1. janúar til 30. nóvember 2015 er eining 1% af launaflokki 132 í launatöflu kjararáðs nr. 502, síðast 7.818 krónur. Frá 1. desember 2015 er eining 1% af launaflokki 136 í launatöflu kjararáðs nr. 502, nú 9.572 krónur. Einingar greiðast alla mánuði ársins, einnig í sumarleyfi. Af því leiðir að ekki er greitt orlofsfé á einingar.

Laun eru við það miðuð að um fullt starf sé að ræða og þannig ákveðin að ekki komi til frekari greiðslna nema kjararáð úrskurði um það sérstaklega.

Um almenn starfskjör ríkislögreglustjóra gilda reglur kjararáðs frá 17. nóvember 2015.

Jónas Þór Guðmundsson

Hulda Árnadóttir

Svanhildur Kaaber